

光緒山西通志

金石記三

記五之三

山西通志弟九十一

賜進士出身頭品頂戴兵部侍郎兼都察院右副都御史巡撫山西提督軍務張昺奉
旨監修

碑碣

唐武德至景龍

唐

陳平北廟碑

武德四年

舊在芮城縣

太平寰宇記陝州芮城縣陳平北廟在縣北一十五里案

碑文云二十六世孫陳處靜以唐武德四年夏從故墓自

南遷北此廟有碑二古柏森然

謹案廟碑久亡記又云陳平祠在縣東北二里平葬

中條山蒲陰縣城西門也八世孫漢魏郡太守陳康

於此分居乃立祖廟令宗族祭祀攷陳平封曲逆侯
後漢章帝改曲逆爲蒲陰爲今完縣地郡國志蒲陰
縣屬中山國記文中條山當是中山後人因此間有
陳平祠妄加條字傳合爲平墓所在也然因此可證
方志中名賢遺蹟如張良樊噲紀信之類或因地名
偶合或實子孫分居立塋建廟相與奉祀非盡無稽
也

文中子講堂碑

舊在鄉甯縣南九十里黃頰山永興寺

王績遊北山賦白牛溪裏岡巒四峙信茲山之奧域昔吾
兄之所止又云北岡之下東巖之前講堂猶在碑書宛然
想問道於中室憶橫經於下筵

舊通志黃頰山東岩石壁高四丈中開罅相距尺許泉湧匯爲池循峪出卽白牛溪也溪上有永興禪寺明季山塌古寺被壓卽文中子授經地也多斷碑有東皋子黃頰詩石刻

謹案黃頰詩石刻今已亡此碑之佚當更久矣觀聞道橫經二語碑蓋其門人所立其下又云惜矣吾兄遭時不平歿身之後天下文明坐門人於廊廟瘞夫子於佳城云云仲淹講學河汾唐初將相多出其門楊炯序王勃集劉禹錫志王華卿墓皮日休文中子碑皆盛推之特隋書不爲立傳新舊唐書於房杜李魏諸人傳中亦無言及者後來晁公武遂斥其事皆妄洪邁又疑其書全僞而宋咸至並文中子亦謂實

無其人夫元經誠阮逸贊作中說傳自其子福時纂述遺言或有夸飾若醉鄉與兄則異趣矣其文放曠山水流連光景所言情事尤足徵信惜乎殘刻久湮不能舉以破千古之惑也

潞州昭覺寺碑

貞觀三年 舊在潞安府

舊唐書太宗本紀貞觀三年十二月癸丑詔曰有隋失道九服沸騰朕親總元戎致茲明罰其有桀大嬰此湯羅銜鬚義憤終平握節各殉所奉咸有可嘉日往月來逝川斯遠雖頂簪放命封樹紀於邱墳紀信捐生丹青著於圖象猶恐九泉之下尙淪鼎鑊八難之間永纏冰炭愀然疚懷用忘興寢所以樹其福田濟其營魄可於建義以來交兵

之處爲義士凶徒殞身戎陣者各建寺刹招延勝侶望法
鼓所振變炎火於青蓮清梵所聞易苦海於甘露所司量
定處所並立寺名支配僧徒及修院宇具爲事條以聞稱
朕哀矜之意於是立昭覺寺於洛州破王世充處也立宏
濟寺於汾州破劉武周處也立慈雲寺於晉州破宋金剛
處也立普濟寺於呂州破宋老生處也立等慈寺於鄭州
破竇建德處也立昭福寺於洛州破劉黑闥處也仍命虞
世南李伯藥褚遂良顏師古岑文本許敬宗朱子奢等爲
碑銘以昭盛業

案洛州本亦作潞州今寺址存碑元已亡不詳其撰人及當年經始意矣

晉州慈雲寺碑

貞觀三年 舊在平陽府

呂州普濟寺碑

貞觀三年 許敬宗撰舊在霍州

集古錄右呂州普濟寺碑呂州者霍邑也唐高祖義兵起
太原始破宋老生於此義甯元年乃以霍邑趙城汾西靈
石四縣置霍山郡武德元年更曰呂州太宗十七年遂廢
也案歐公題幽州昭仁寺碑陰云唐自起義與羣雄戰處
後皆建佛寺云為戰亡士薦福湯武之敗萊糾殺人固
亦多矣而商周亭園皆數百年其荷天之佑者以其心
大公為民除害也唐之建寺外雖託為戰亡之士其實
贖殺人之咎耳其撥亂開基有足壯者乃區區於此不
陋哉竊謂文皇此舉亦孟子所謂云不嗜殺先王不忍人
心也貴以懼殺人之召禍殊為迂謬至其跋昭福寺碑云
宗英雄智識不世之主而幸感習俗之弊崇信浮圖豈以
其言浩博無窮而好盡物理為可喜耶蓋自古文姦
以惑聽者雖聰明之主或不能免則持平之論矣

正覺寺碑

貞觀三年 進士靳杜撰舊在絳州陽王里

景雲觀天尊碑

有陰

貞觀八年 正書篆額天尊之碑四黑字今在聞喜縣

聞喜志補右祁觀元始天尊素像碑在邑東五十里觀

底村

即古西祁村

景雲觀書作北魏體無撰書人名文內祁

文才稱太上道民太上者真誥云太上高聖玉晨大道

君也乃上清真人爲老子之師而或云卽老子非也道

民之稱謝太傅帖已見之黃山谷言安石奉五斗米道

者此則奉老子正不嫌同辭所叙祁氏源淵稱爲堯後

以堯伊祁氏也使持節鎮西大將軍祁山君永繫之殷

不知何人祁奚而稱爲周陽侯亦不知出何書大要其

家傳之附會耳碑陰景山府隊正乃府兵之制其餘人

名亦祁氏爲多此村之爲西祁以此也

碑中別體字蔽作弊悟作病覆

作覆之作坐深作深稟作稟應作應法作爐臺作臺得

作得儀作儀示作丸聖作聖唐作唐而銘內善惡同趣

何惡惡字並書竟不可讀此
漢代刊石所以有察書人也

太常寺掌禮院請創夏禹廟事碑

貞觀九年 舊在河津縣禹門口見金石志

太平寰宇記蒲州龍門縣大禹祠在縣西二十五里魏土
地記曰梁山北有龍門山上有禹廟隋末摧毀唐貞觀九
年奉勅更令修理

興國寺碑

貞觀十年 在霍州郭莊見舊通志

隋益州總管司馬裴鏡民碑

貞觀十一年 李伯藥撰殷令名書今在聞喜縣裴柏村

晉公祠

金石錄令名與其子仲容皆以能書擅名一時而令名遺

迹存者惟此碑耳筆法精妙不減歐虞惜不多見

金石萃編按唐宰相世系表裴氏定著五房曰西眷裴曰洗馬裴曰南來吳裴曰中眷裴曰東眷裴此司馬裴君乃東眷裴也碑云君諱鏡民字君倩河東聞喜人也唐虞之盛伯益控其遙原殷周以還仲衍有其餘慶史表序云裴氏出自風姓顓頊孫皋陶生伯益賜姓嬴氏生大廉大廉五世孫曰仲衍至非子之支孫封豳鄉因以爲氏今聞喜地是也六世孫陵當周僖王之時封爲解邑君乃去邑從衣爲裴碑又云微則擅美當塗憲則流芳中夏晉書裴秀傳秀河東聞喜人也八歲能屬文叔父微魏冀州刺史有盛名賓客甚衆云云卽碑所云微則擅美當塗者也微子楷楷有五子與瓚憲禮遜憲字景思鯁直宏達通機識命

仕石季龍累官右光祿大夫司徒太傅封安定郡公卽碑
所云憲則流芳中夏者也世系表云東眷裴德歡長子澄
字靜慮後魏州刺史澄子景漢字仲霄後周車騎大將軍
景漢子鏡民隋兵曹郎鏡民子熙載兵部尙書熙勤洛州
長史碑云祖靖慮魏銀青大夫汾州刺史父澄周車路大
夫儀同三司晉州刺史此官位較史表爲詳至鏡民與熙
勤則更詳矣然表體自是如此無嫌略也碑又云建德初
以君爲宋王口記室參軍遷司隸宣政口年授吏部上士
攝少吏部建德爲周武帝建元至七年三月改元宣政六
月帝殂宣帝嗣立明年改元大成是宣政只一年碑所泐
者乃元字也周明帝有三男第三名實字乾辯出後文帝
子宋獻公震建德三年進爵爲王卽以君爲記室參軍者

也文獻通考職官攷後周有吏部中大夫一人又有小吏部下大夫一人掌貳吏部之事領司勳上士等官此碑云授吏部上士攝少吏部似卽小吏部或通考訛也碑又云開皇受禪其日除尙書左口兵部尋改爲兵部侍郎卽表所云兵曹郎也碑又云華陽地險控御遐長蜀王秀擁旄作鎮以君爲西南道行臺兵部侍郎及行臺廢除口州總管府樣兼益州總管府司馬隋書列傳庶人秀高祖第四子也開皇元年立爲越王未幾徙封於蜀二年進位上柱國西南道行臺尙書令歲餘而罷碑所云蜀王秀卽庶人秀也據碑則秀雖罷行臺而鏡民仍爲司馬也碑又云開皇十六年西南夷構亂君總率士卒應機致討後軍不繫戰危喪律以三月癸丑朔十九日辛未陷口口庭季路結

纓志無苟免此則鏡民之卒年月日也隋書高祖紀十六年不書西南夷搆亂事惟載十七年二月癸未太平公史萬歲擊西甯羌平之庚子上柱國王世積討桂州賊李光仕平之碑所載者不知卽此事否不能定其孰是也碑爲李百藥製殷令名書令君唐書無傳述書賦注有云令名陳郡人畫家傳云陳司農不寄子金石錄云令名與其子仲容皆以能書擅名一時則卽仲容之父也唐書百藥傳貞觀元年拜中書舍人封安平縣男四年授太子右庶子遷散騎常侍進左庶子宗正卿爵爲子久之乞致仕卒年八十四是其製此文亦在致仕之年矣

幕府作莫府裴楷作張楷喪律作張

作或借用或別體也

志略焯按鏡民與皇甫誕皆隋臣死王事者故貞觀中追

立碑以表之令名開山子與子仲容世工書精妙曠古見法書要錄所書尙有頭陀寺碑今不傳

聞喜縣志補碑已見趙明誠金石錄額題益州總管司馬裴君碑九篆字而趙作益州長史似未見額也案北史作鏡人避文皇諱而此碑立於貞觀尙作鏡民從其實也又北史止云仕隋位曹郎而不詳所歷官階且弁其陣亡事亦略使無此碑則結纓裹革之國殤竟不著於後世矣故古碣之可貴不僅在區區書法也

逍遙樓詩碣

貞觀十二年 長孫無忌楊師道行書舊在蒲州府見金石錄

汾州宏濟寺碑

貞觀十四年 李伯藥撰正書舊在汾州府

金石錄據唐會要此碑李伯藥撰唐太宗初卽位詔於建
義以來交兵之處爲義士凶徒殞身戎陣者各建寺刹分
命儒臣爲銘凡七碑余所得者汜水等慈呂州普濟幽州
昭仁與此碑凡四其處世南褚遂良所撰今皆亡矣

晉祠銘

有陰

貞觀二十一年 太宗御製並行書今在太原縣

金石錄晉祠者唐叔虞祠也高祖初起兵禱於叔虞祠至
貞觀二十年太宗爲立碑

石墨鐫華唐得天下後太宗祠晉侯而爲之銘晉侯者唐
叔後霸天下者也據碑高祖起兵時雖禱於晉侯之祠而
以是報享之太宗製並書全法聖教蘭亭而縱橫自如但

石理惡歷年多其銖鍛之存者無幾耳

按晉侯即唐叔虞別無所謂晉侯祠

者聖教序降於貞觀二十二年又闕二十五年至高宗咸亨三年沙門懷仁始集石畢書成上石豈可謂太宗此嗜全法聖教序乎賞鑑家往往不考事實若此

金石文字記祠在太原府西南四十里距今太原縣八里而今縣則古晉陽之故址唐時爲并州爲北都爲河東節度使治昔人立廟於此以祀唐叔考之北齊書已有其名而唐高祖起兵嘗禱於此冊府元龜太宗貞觀二十年正月幸晉祠樹碑製文親書之於石今在祠中蓋昔之并都甚大祠去城三四里爾在懸瓊山麓晉水之所發源後人於此引池結亭架橋其上林木翳然足爲一方之勝其廟負山而東面者晉水之神南面者唐叔之神後晉天福六年封唐叔爲興安王臺駘爲昌甯公而宋時又封晉水神

爲顯靈昭濟聖母飾爲婦人之像今之人但言聖母而不復知有唐叔爲古先有土之君矣水經注云昔智伯遏晉水以灌晉陽後人踵其遺蹟蓄以爲沼沼西際山枕水有唐叔虞祠水側有涼堂結飛梁於水上北史薛孝通嘗與諸人同詣晉祠皆屈膝盡禮孝通獨捧手不拜顧而言曰此乃諸侯之國去我何遠恭而無禮將爲神羞是則當時之所祀者唐叔非水神也碑陰字體不一其上右方云司徒太子太師上柱國趙國公臣無忌太子太保上柱國宋國公臣瑀特進太子詹事兼左衛率上柱國英國公臣勣光祿大夫刑部尙書上柱國鄖國公臣張亮禮部尙書上柱國江夏郡王臣道宗太常卿駙馬都尉柱國安德郡公臣楊師道正議大夫守中書令太子左庶子兼攝吏部尙

書護軍臣馬周凡七行皆當日書者其餘則皆宋人續題
 錯亂無次其空處又有洪武二年行省參知政事楊憲題
 而絕無一唐人題者以御書之碑不敢擅刻也他碑則唐
 人之題固繁繁也案宋人題名上方有經略安撫使會布
 納所書次為熙甯戊申范陽盧大雅臨川王安禮其左側
 為開封苗仲淵署政和五年十月下方凡四處一政和乙
 未轉運使陳知存一元祐已巳丹陽邵堧一元豐三年
 龐京孫一熙甯癸丑太原王安脩廣平程易安陽蔣叟
 曝書亭集唐太宗自晉祠興師定天下貞觀二十一年七
 月御製碑文及銘勒石於叔虞祠東隅碑陰列長孫無忌
 蕭瑀李勣張亮李道宗楊師道馬周銜名後人覆之以亭
 而庸工以字畫上石稍淺遂刻而深之帝嘗自述作書之
 法惟求骨力骨力既得形勢自生不意為庸工改鑿而骨
 力形勢俱失矣予嘗五至祠下輒摩挲是碑覽古興懷集

少陵野老詩句文章千古事社稷一戎衣書於亭柱富平
李因篤子德見而賞其工因遺書與子定交於其歸也拓
銘一木贈之而書其後

鐵函齋書跋碑額貞觀二十一年七月八字乃女皇飛白
書飛白書不傳傳者此八字耳

案碑首乃貞觀廿年正月廿六日九字亦具隸體

金石萃編案唐書本紀太宗以貞觀十九年十二月辛并
州二十年正月在并州此文當卽在是時撰書而碑首題
貞觀二十一年七月者殆摹勒上石者明年七月也文云
先皇襲千齡之徽號膺八百之先期用竭誠心以祈嘉福
又云無言不酬無德不報所以巡往跡賽洪因臨汾水而
濯心仰靈壇而肅志是爲高祖禱晉祠起義兵之證高祖
紀大業十二年爲太原留守時羣賊蜂起江都阻絕太宗

勅舉義兵高祖乃命太宗募兵旬日間衆且一萬郡丞王
威武牙郎將高君雅恐高祖爲變相與疑懼請高祖所兩
於晉祠將爲不利晉陽鄉長劉世龍知之以告高祖高祖
陰爲之備是高祖禱晉祠事常在此時顧亭林云其廟負
山東面者晉水之神南面者唐叔之神宋時封晉水顯靈
昭濟聖母飾爲婦人之像云云按此碑有云豈若高唐之
廟空號朝雲陳倉之祠虛傳夜影蓋以高唐神女陳倉寶
雞夫人爲比是在唐初晉水神亦女像也碑陰書從官七
人四人不著姓三人著姓與比干墓碑同太祖生八子第
四子璋封畢王生二子長曰韶生一子卽道宗也貞觀初
由任城王徙封江夏史傳標目直稱江夏王無郡字餘人
官爵碑與傳皆合

太原縣志晉祠碑銘後益浸泯殆不可辨乾隆庚寅邑貢生楊堉購舊搨未損者摹鉤校刊峙於前碑之次

晉州刺史裴府君碑

貞觀二十二年 上官儀撰正書姓名殘闕見金石錄

秦州龍門令皇甫忠碑

貞觀中 著作郎李儼撰舊在河津縣

集古錄右忠爲秦州龍門令歲滿縣民前左勳衛裴公隱等一千三百人申省請留八座報云公等請來遲晚縣令今已替訖好人堪用縣國並須豈一縣士庶獨懷惓惓惜所請不允忠以唐太宗時爲令當時臺省文字如此可愛秦州者義甯元年以河中之汾陰龍門置治汾陰武德二年徙治龍門太宗十七年州廢今碑後列人姓名有錄事鄉

長鄉老里正縣博士助教佐史等今之縣令惟錄事里正
其名在耳

廣勝寺太宗御製贊石刻

貞觀中 舊在趙城縣東三十里霍山上

霍州志廣勝寺在霍山上有飛虹塔爲阿育王藏舍利
處相傳爲中原第二塔寺有唐太宗御製讚

興唐寺斷碑

貞觀中 舊在趙城縣

志略興唐寺在霍山谷中鎮廟東南喬宇霍山記云寺爲
唐太宗時建斷碑猶存

大覺寺勅石刻

貞觀中 今在長子縣

長子縣志大覺寺縣西北五里寺頭村唐貞觀間建石刻貞觀賜勅

太宗御製詩石刻

貞觀中 舊在介休縣回鑾寺

志略縣山抱腹巖麓回鑾寺卽興國寺太宗登山禮佛至此回鑾故以名寺抱腹巖在縣東南五十里

司空裴寂墓碑

貞觀中 舊在臨晉縣

太平寰宇記蒲州臨晉縣故司空裴寂墓在縣東北一十七里墓碑卽祕書虞世南之文率更令歐陽詢書

臨晉縣志裴寂碑舊志云因搨取不息土人瘞之

泌水碑

貞觀中 虞世南撰並書舊在文水縣北五龍泉村見縣志

獨擔山靈顯王廟碑

貞觀中 今在忻州西南二十里

忻州志唐貞觀中命薛遵度採雲母封山神爲靈顯王廟立碑寰宇記雲母山一名獨擔山山上有穴四入五里出玉芝唐貞觀中八年勅賜薛遵度採雲母此山

黃頰山詩碣

王績撰 舊在鄉甯縣南九十里永興寺見舊通志

都尉宋舉墓誌銘

永徽二年 今在潞安府

長治縣志宋都尉墓在城西南五里明嘉靖中宗室雲

溪築墅得墓誌銘文甚古乃遷葬高原埋銘其下復勒石記之

謹案誌云舉太原西河人祖秀齊鎮遠將軍父悅隋本郡中正大唐興運更造二儀君舉旗斬將名震霸功滅敵摧城勳參王業特授儀同三司而不著其官都尉縣志蓋據文前標目所書銜也宋氏有西河廣平二望在西河者居介休漢屬太原若唐之西河則爲汾州當云西河介休矣云太原西河人又不志居潞之始皆珥筆者之疎也

聞喜縣令江彥碑

永徽二年 正書見金石錄

靈光寺碑

永徽三年 王勃文舊在曲沃縣東南二十四里閭村見縣志

韓韓廟碑

永徽五年 舊在汾西縣東二十里韓韓村

太平寰宇記晉州霍邑縣韓韓廟在縣西百里廟內有碑按記文云是廟建於永徽五年百姓爲羅縣開國燕伯龍等立

雲麾將軍燕鸞神道碑

永徽五年 李儼撰舊在霍州

太平記又神道碑云唐故雲麾將軍燕鸞字伯龍卽霍邑人也

謹案墨池編燕府君碑李儼撰在霍邑舊通志唐將

軍燕巖墓在霍州南寺莊有碑當是一人據太平記
名爲非巖以字伯龍證之乃志誤也巖不見史而爲
鄉人廟祀必有功德於民惜兩碑俱佚無從知矣

堯廟碑

顯慶三年 舊在平陽府

太平寰宇記晉州臨汾縣堯廟在縣南十里堯碑云舊在
汾水西晉元康中移於汾水東顯慶三年移就今廟

壽生寺碑

麟德二年 今在聞喜縣西衛家莊

蒲州刺史李公德政碑

乾封元年九月 舊在蒲州府見金石錄

大將軍上柱國郭君碑

乾封二年 今在汾陽縣北三十里永安鎮

曝書亭集右郭君碑在汾陽縣北七十里

案此誤碑實在永安非郭社

余於丙午秋經郭社村行溝中仰見土岡之上碑額微露環岡數里乃登讀其文皆駢麗語首二行剝裂君之名字門世與撰文者皆闕焉其知爲郭君者藉有額存也碑立於乾封二年中有云揮霜鉞而斬老生蓋從太宗攻靺婁者按舊唐書宋老生棄馬投壑甲士斬之新唐書則稱爲劉宏基所殺溫大雅創起居注又云老生攀繩上城軍頭虛君謬所部人跳躍及而斬之世咸不知揮刃者之爲郭君而君之名以石裂終不傳可惜也

金石萃編按此碑前段不知缺幾行後則銘辭全缺存者二十一行惟前一行後二行存字無幾餘則每行只缺數

字尙可讀也文中姓名里貫全泐賴額題郭君二字知其
姓首行泐文中有州刺史字司徒公字必是先世之歷官
又有分銅虎字高宗之世不避虎也又有志隆字玩上文
義當是其祖名其父嵩祖與父皆無官位此下叙君之事
蹟云大唐建義旗薦名相府揮霜劍而斬老生奮長戟而
摧霍邑授上儀同三司時絳州逆命獲勳居最授朝請大
夫武周作梗建德亂階危口孤立是日皓州總管真卿公
李仲文任之心膂展效立功授上輕車都尉貞觀三年額
利擾亂邊垂太宗文皇帝命英公薄伐公獲勳第一授上
大將軍賞物四百段召公爲金門關口七年又辟公滕王
口府司馬固辭不受太宗文皇帝崩遺詔起義元從班例
加勳詔授上柱國皇帝駕幸并州公策蹕遠口蒙恩下進

疾歿於私第以乾封二年歲次丁卯十一月丁卯二十八日甲申遷窆於大夏鄉隱泉之原夫人王氏令望江東派流并部子宏道並在親衛亞劉宗之兩驥埒韋氏之雙珠云云此君之大略也唐書宰相世系表郭氏後漢末大司農郭全居陽曲裔孫徙潁州又華陰郭氏出自太原子孫徙馮翊又郭有道裔孫居魏州昌樂又中山郭氏世居彭城凡此數派皆無君祖父名不知君何派也君里居不可知據碑云辟勝王府司馬公志性林泉固辭不受是不就辟而索居也皇帝駕幸并州策駟迎口是從家居迎蹕於并州也則君之所居在河東矣山西通志汾陽縣北四十里有謁泉山山上有隱泉水水經注文水又南逕縣右會隱泉口云云據碑窆於隱泉之原則墓在今之汾陽其居

亦當在汾陽矣碑云斬老生摧霍邑是一事在大業十三年高祖初建義旗時絳州逆命乃八月事武周作梗指武德二年劉武周據并州事建德亂階指武德四年竇建德援王世充事新唐書太宗紀武德三年四月擊敗朱金剛於柏壁金剛走介州太宗追之一日夜馳二百里宿於雀鼠谷之西原軍士皆饑太宗不食者二日行至浩州乃得食碑所云危口孤立是日浩州卽指此碑云貞觀三年頡利擾邊垂太宗命英公薄伐頡利卽突厥頡利可汗英公卽英國公李世勣太宗紀三年十月十一日庚申并州都督李世勣爲通漠道行軍總管華州刺史柴紹爲金河道行軍總管任城王道宗爲大同道行軍總管幽州都督衛孝節爲恆安道行軍總管營州都督薛萬徹爲暢武道行

軍總管以伐突厥卽此事也碑云七年辟公滕王府司馬
新舊高祖諸子列傳鄭惠王元懿始王勝貞觀中徙王鄭
此與勝王元嬰別元嬰乃貞觀十三年所封不在七年也
太宗遺詔乃二十三年事皇帝幸并州乃永徽五年正月
事高宗紀二月赦并州及所過州縣義旗初嘗任五品以
上葬并州者祭之加佐命功臣食別封者子孫二階大將
軍府僚佐存者一階高宗之加恩於義旗功臣爲已厚也
此時君策駟遠迎宜在進階之列而碑泐矣十一月丁巳
朔碑不書朔字者省文也夫人王氏碑云派流并部是太
原王氏矣又云痛長年之永別淚染湘川悲隴水之分流
更成嗚咽玩文義是夫人尙在也而得列於文內是此碑
創見于宏道並在親衛上闕五字下有兩驥雙珠之語是

二子也碑之可考者如此惜無史傳可互證也碑書扼扼史記封禪書海上燕齊之間莫不搖腕是也咀嚙六經嚼字右旁從舜字書無舜字疑是嚼字之說嚼篆作嚙古文與舜相似元應在篆法辨訣所謂華菜葉乘頭並異爵爰受首俱奇者是也起義元從班當作班字班可通作班此則以班為班也

鄭太子壽碑銘

總章元年 盧照鄰撰舊在翼城縣

翼城縣志墓在縣西雲唐村太子名壽康公之子因質於韓哀侯居之息城後歿而葬此

謹案碑不知亡於何時昇之文載縣志文略云鄭太子壽者康公之子桓公之二十代孫也因以運逢陽城敗我鄭次辛亥之歲崩山湯岸餒銳氣於韓兵降志辱身欽盟符於晉血邑封千戶官具百寮今之壽

城斯其地也享年七十八薨於晉葬於天陵南攷史
記六國表韓烈侯五年周安王七年鄭康公立文侯二年
安王十年伐鄭取陽城哀侯元年安王二十六年與趙魏分晉
二年烈王元年滅鄭因徙都鄭康公二十年滅無後鄭世
家幽公元年韓武子伐鄭殺幽公鄭人立幽公弟駘
是爲緡公緡公二十年韓趙魏列爲諸侯二十七年
鄭相子陽之黨弑緡公而立幽公弟乙爲君鄭君乙
立十一年韓伐鄭取陽城二十一年韓哀侯滅鄭并
其國君乙卽康公也由安王七年丙戌至烈王元年
丙午得二十一年表云康公二十年滅誤當從世家
文中運逢陽城敗我鄭次似指十一年韓取陽城辛
亥之歲山崩湯岸云云似指國滅時然辛亥距鄭亡

已五年與史不合又鄭自桓公立國歷武莊昭厲文
穆靈襄悼成僖簡定獻聲哀共幽縉至康公得謚者
凡二十君文謂壽爲桓公二十代孫似據此然厲公
爲昭公弟襄公爲靈公弟成公爲悼公弟幽縉康三
公並共公子則止十五世也而唐書宰相世系表作
桓公十三世孫幽公爲韓所滅與此同一紕繆唐人
譜牒序次家世往往失詳若是文又云王京觀道士
鄭大暈家長鄭君則合宗並太子之後芟荒蕪蔓徙
植延陰豐碑下鹿盧高墳起馬鬣得青鳥之舊地臨
絳邑之新田於時大唐總章元年歲次戊辰五月甲
申之一日也則敘其後裔修墓建碑之由史記謂康
公無後世系表鄭氏亦止滎陽滄州二望皆祖幽公

而太子以宗嗣反於古籍無徵其式徵亦甚矣賴此碑稍知其始末千百年後器亡辭存得傳於世又未爲不幸也

師言墓志

總章二年 舊在長治縣

長治續志案誌名已泐師言其字也前無標題亦不知何姓惟云其先炎帝之後祖齊鄉郡太守父英隋任州主簿鄉郡今武鄉石勒分上黨置郡後魏去武字師言與其母同日葬故文云與太夫人王氏合葬於州城西北三里文中頗復無依几筵禮革蓋卒於母喪時也

碧落碑

總章三年 彖書釋文鄭承規正書咸通十一年立今並

在絳州

集古錄碧落碑在絳州龍興宮宮有碧落尊像篆文刻其背故世傳爲碧落碑據李璿之以爲陳惟玉韓李漢以爲黃公譔書莫知孰是洛中紀異云碑文成而未刻有二道士來請刻之閉戶三日不聞人聲人怪而破戶有二白鴿飛去而篆刻宛然此說尤怪世多不信也碑文言有唐五十三祀龍集敦牂乃高宗總章三年歲在庚午也又云哀子李訓誼譔謀爲妣妃造石像按唐書韓王元嘉有子訓誼譔而無謀又有幼子訥元嘉以則天垂拱四年見殺在總章三年後十八年有子訥不足怪而不應無謀蓋史官之闕也

金石錄右唐碧落碑大篆書其詞則唐宗室黃公譔所述

或云陳惟玉書或云譔自書皆莫可知李肇及李漢並言李陽冰見此碑裴徊數日不去又言陽冰自恨其不如以槌擊之今缺處是也此說恐不然陽冰嘗自述其書以謂斯翁之後直至小生於他人書蓋未嘗有所推許唐人以大篆當時罕見故妄有稱說耳其實筆法不及陽冰遠甚也

廣川書跋碧落篆字李肇得觀中石記爲陳惟玉書字奇古行筆精絕不類世篆學而惟玉於唐無書名不應一碑便能到古人絕妙處李陽冰於書未嘗許人至愛其書寢臥於下數日不能去段成式謂碑有碧落字故名之李肇謂碑在碧落觀故名李漢謂終於碧落字而得名余至絳州龍興宮考其記知舊爲碧落觀又篆文若未畢者終非

碧落字則肇說是也其云有唐五十三禩龍集敦牂永叔
謂高宗總章三歲以唐歷考之實咸亨元年總章者誤也
又絳州碧落篆刻天尊背州將不欲以槌擊石像乃摹別
石因封其舊石像今世所得皆摹本也雖橫直圓方典型
有稽然遁其神者衆矣段成式言樊宗師作誌令陳惟玉
立太行上此言險怪難知豈嘗求得其當而妄戲哉世言
字不考古甚則以品爲鄰今考古文數字正如此便知後
世不識古字而妄議者可以歎也

金石文字記碧落碑篆書韓王元嘉四男爲母房太妃立
碑云有唐五十三祀龍集敦牂則咸亨元年也唐書言垂
拱中元嘉徙絳州刺史與此不合 今絳州有咸通十一
年鄭承規釋文但篆文難通者頗多而翻刻復多舛誤如

淮館儀僊釋僊爲山貪逮餘漏釋逮爲建注儀鄰以同煥
釋同爲洞直書心事釋書爲言敏心感慕釋敏爲叨並誤
敏古叩字出周禮宋謝靈運山居賦眷敏肱之逸曲感江
南之哀歎用此字此碑用粵若稽古作乚託字作佹宋韓
侂冒字本此

松泉文集董道廣川書跋云段成式謂碑有碧落字故名
李肇謂碑在碧落觀然考之國史補則肇正謂有碧落字
耳國史補絳州有碑篆字與古文不同頗爲怪異李陽冰見而寢處其下數日不能去驗其文是唐初而不載書者姓名碑上有碧落二字人謂之碧落碑李漢又謂碑終於碧落字董道駁其
非今以篆文驗之僅有棲真碧落一語旣非全文結束亦
非文中要語攷古人詩文字迹舉一行首標目者有之無
以末字目全文者其謬蓋不待言歐陽公集古錄謂龍興

宮有碧落尊像篆文刻其背宋潛溪亦云唐高宗咸亨元年庚午歲韓王元嘉子訓等爲其妣妃房氏造碧落天尊像於龍興宮而刻文字於背蓋廣川則嘗親至絳州龍興宮攷其記知爲碧落觀今以篆文驗之但云立大道天尊建侍真容無所謂碧落天尊者疑廣川所云在碧落觀而龍興舊爲碧落者爲得其實此碧落之所以名也廣川又謂州將不欲以槌擊石像背乃摹別石今所傳皆摹本而五總志謂絳澤二州皆有韓王元嘉子黃公爲妣妃薦福作文立石文雖不同皆名碧落在絳州者刻於天尊之背在澤州者刻於佛龕之西今以篆文驗之則云哀子李訓誼譔等銜恤在疚冀懷靡所永言報德思樹良因敬立大道天尊建侍真像又云敬守真容庶幾終古則刻文像

背者近之州將摹石事理所有顧其文不容有二則所云
澤州傳刻者又不知出於何人也集古錄云李璿之以爲
陳惟玉書李漢以黃公譔書趙明誠金石錄云其詞則宗
室黃公譔所述或云陳惟玉書或云譔自書廣川疑惟玉
唐無書名不應一碑便奄有秦漢到古人絕妙處宋潛溪
又謂翠巖襲聖子以爲宗室璿或有所攷終莫定其何人
鑒彼葉據李璿之玉京宮記以爲陳惟玉李漢黃公譔以
爲李璿弟漢始莫定而翠巖襲聖子則又以爲宗室璿豈
或有所考耶吳龍張天雨讀卽爲譔爲曜者非當以釋文
鄰字爲是俞希盧辨明作卽亦大策而釋文則又訛矣蓋
此難出於鑒衆篆籀諸而前人論書率歎其妙絕至謂李
陽冰見而寢處其下數日不能去又言陽冰自恨其不如
以槌擊之今缺處卽是予謂前說歐陽信本觀索靖碑語
附益之後說鄙謬不足辨趙明誠謂唐人大篆少見故妄

有稱說似得其隱然其文亦不純用籀文故周伯琦疑其
雜出諸體而李西涯亟取其說愚謂自漢以來草隸盛行
篆法惟習說文解字古文籀書幾於中絕所傳陽冰二徐
及夢英輩大率皆繹山一種以勻圓齊整爲上不知古人
繁簡參差惟意所適按之石鼓及夏周以來器物款識尙
可推其遺意此碑超出相斯窠臼筆法亦自深穩意訓譔
弟兄皆振奇好古之士雜取籀文兼及小篆加以詭辭標
置駭動世俗如道士白鶴神異故有名當代爾

潛研堂金石文跋尾右李訓等造大道天尊像記世所稱
碧落碑也篆書奇古小儒咋舌不能讀賴有鄭承規釋文
稍可句讀至其假借之原好古者猶或昧焉有以聲相轉
而借者窒之爲空凭之爲伏盾

古文

之爲廉是也有以同

聲相借者顛之爲宣頽之爲規瓊之爲柔是也有以偏旁
相同而借者蜚之爲敦構之爲端藻琛之爲深壓之爲纏
璵之爲號璫之爲維蠲之爲烈晟之爲誠衙之爲同坡之
爲度禱之爲猷柯之爲何是也休本沈溺字故借爲強弱
之弱蜀本目眴字故借元妙之元彰本昌吝字故借爲文
章之文廣雅筵酉皆訓席故以迺爲筵觀見周禮廳堂見
石鼓文假見漢書鄴祿懸卓箕弁栗貞之爲古文辨戴融
之爲籀文皆見於說文略舉一隅亦足見古人精於小學
非不知而妄作也 碧落碑釋文咸通十一年鄭承規所
書距造像時已二百年矣承規書名不甚著而楷法道整
釋文未審卽出承規之手或別有傳授否要非精研六書
博涉古今者不能辨也自宋以來篆書家奉此釋爲金科

玉律莫敢易一字顧亭林始糾其誤者數字然如直書心事句碑本釋爲書而顧謂其誤釋爲言則又太不檢照矣予習此碑有年乃覺承規所釋尙有未當者而前人皆未及舉正如瓊蟻鄭釋爲瓊儀說文本有瓊字讀若柔從玉變聲變與猱同故瓊有柔音不當釋爲瓊也噪開鄭釋爲噪閣按玉篇噪古弔切聲也亦作叫又嘒五弔切叫也噪與嘒皆叫之異文不當釋爲噪也碑中遼字兩見鄭前釋爲遼後釋爲建並誤按說文遼古文及字碑前云敬立大道天尊遼侍眞容後云貪遼餘漏皆當釋爲及宋書范蔚宗徐湛之兩傳並有貪及視息之語則貪及二字固有本矣鄭謂爲建顧謂爲遼所謂楚失而齊亦未爲得也錢侗跋云此碑書體不必純用小篆然其用字結體偏旁假借多有根據卽以說文解字校之如唐之作縣三之作貳言之作

[illegible]

本古文奏借爲伏願於義於聲殊難通轉皆所未詳餘如
觀字登於周禮莫字載於潛虛昌字見於習龍廳字隋字
見於石鼓文廿字見於秦刻寸又諸字雜出鐘鼎銘款求
之於古皆可徵信不得以尋常篆例視之也向來著錄家
致之未盡爲
廣其說如此

金石萃編按碑文凡六百三十字闕者四字文皆古猶不
易讀咸通十一年鄭承規用正書釋文刻石於旁然後可
讀然承規稱奉命書命字空一格不知奉何人之命也碑
云有唐五十三祀龍集敦牂哀子李調誼譔譔銜愼在疚
寅懷靡所云云唐自武德元年至咸亨元年得五十三年
是年庚午太歲在午曰敦牂也是年三月改元碑無年號
月日不知其爲咸亨抑尙是總章也訓誼譔譔皆韓王元
嘉之子居母喪造像祈福而自稱哀子此後世母喪稱哀
子緣起也韓王元嘉高祖第十一子新唐書元嘉傳稱其

有六子下列名只訓誼謚謚訥五人宗室世系表亦只訓
誼謚謚訥五人內謚謚次第表與傳互倒今表與碑合則
傳誤也舊史傳稱元嘉長子訓高祖時封潁川王早卒次
子誼封武陵王官至濮州刺史天后臨朝將誅戮宗室不
附已者元嘉大懼與其子通州刺史黃公譔謀起兵不成
坐誅神龍初封其第五子訥爲嗣韓王舊傳止此四人謚
不與焉新舊傳則云訓潁川王誼武陵王謚上黨公蚤卒
譔黃公又云謚通音律恩杭州別駕與譔俱死神龍初第
五子訥嗣据集古錄以爲唐書韓王元嘉有子訓誼譔而
無謚蓋史官之闕於是歐公撰唐書乃補謚名於傳也然
歐旣謂舊史無謚爲史官之闕何以新書稱元嘉六子所
敘又止五子且旣云謚上黨公早卒矣而又云謚與譔俱

死似同爲武后所害者所未詳也頗疑蚤卒二字當在誼
武陵王之下誤書於譔上黨公下耳訓生於貞觀年至咸
亨元年造像立碑時約三十歲則舊傳稱早卒者亦非也
特在垂拱被害時不見有訓且不見有誼則已先卒矣兩
唐書傳但載元嘉母爲昭儀宇文氏而不及元嘉之配某
氏碑又稱先妃不詳其姓據鑾坡集跋謂爲房氏因攷唐
書房元齡傳云貞觀十五年女爲韓王妃男遺愛尙高陽
公主乃知房氏卽元齡女也韓王以貞觀十五年册妃則
訓之封潁川王當在高宗時舊史稱高祖時者亦誤也訓
爲母造像而云土木非可久之致銘鑄爲誨盜之先是不
爲範金也肅奉沖規圖輝貞質沖規空一格與前祇奉嚴
訓同例當亦承其父命爲之貞質者貞石之質則天尊爲

石像也詳玩下文有辟容伊穆元儀有煒清輝懋範宛若
前蹤之語似乎其母像亦刻石侍於天尊之側者自咸亨
造像刻記至咸通十一年釋文刻石相距二百十年不知
何以忽有此釋文之刻據元嘉傳稱神龍初復得土以第
五子訥嗣傳至孫煒建中中改王郛後懿宗以郛王卽位
復改嗣韓王懿宗建號咸通此碑殆以韓王復嗣而追崇
其先祖之功德及於遺碑因加以釋文也舊傳稱元嘉少
好學聚書至萬卷又采碑文古迹多得異本及與其子讓
坐誅籍沒父子書籍最多皆文句詳定祕閣所不及新傳
稱元嘉藏書皆以古文字參定同異讓工爲辭章孟利貞
嘗稱其文曰劉鄰之周思茂不是過也則此碑爲讓所撰
書理或有之而文前列四子名中稱訓等痛繼過陳云云

無譏爲文之據則亦付之臆度而已有唐一代篆書碑無
多碧落碑尤爲有名宋初郭忠恕所以編入汗簡今取碑
與汗簡參較汗簡筆法皆得籀文遺意此碑筆畫皆易以
方整全非籀文面目至其文字之不同者如思樹良因碑
文思作畧良作畧汗簡思作畧良作畧惟悅惟忽碑文忽
作畧汗簡作畧寄於寥廓之場碑文於作寥廓作畧汗簡
於作寥廓作畧玉笈宣徽碑文宣作畧汗簡作畧清化其
際碑文其作畧汗簡作畧先妃碑文先作畧汗簡作畧克
懋瓊儀碑文瓊作畧汗簡作畧潛研跋謂瓊以同音借爲
柔字不當釋爲瓊然汗簡已作瓊字勳容資於典禮碑文
資作畧汗簡作畧恩深振古碑文深作畧汗簡作畧抗志
滌源碑文源作畧汗簡作畧備元兼洞碑文儒作畧汗簡

作夙眞俗兩該碑文俗作𣎵汗簡作𣎵茶𣎵俄集碑文俄
作𣎵汗簡作𣎵痛編過陳碑文陳作𣎵汗簡作𣎵所以食
及餘漏碑文食作先文爲𣎵汗簡亦作𣎵皆先字釋文誤
作食字祈福元宗碑文祈作祿汗簡作𣎵誨盜之先碑文
盜作𣎵汗簡作𣎵睥容伊穆碑文伊作𣎵汗簡作𣎵揭列
仙於雲路碑文仙作𣎵汗簡作𣎵融心懸解碑文融作𣎵
汗簡作𣎵播熊章之烈碑文播作𣎵汗簡作𣎵冀申烏烏
之志碑文烏作𣎵汗簡作𣎵終天何及碑文何作𣎵汗簡
作𣎵蓋碑文重摹汗簡翻刻然彼此各有筆畫舛異不能
定其孰是也

絳州志碧落碑石刻在州衙門內碑陰刻鄭承規釋文
遺宋元兵燹缺裂有後人新刻一碑僅存形似

謹案碑有絳州澤州二刻在澤州者爲摩崖今已不傳其地則碧落寺也可證絳碑之名碧落確因觀名而起篆文茂美歷代推崇獨趙明誠稍有微詞而郭宗昌作金石史乃極詆之至目爲三家村學究教小兒角險字凡俗可厭真敢爲大言矣茲錄汪錢諸跋匪惟藉規六書精蘊亦以見以此事具有本領未可枵腹高談妄議古人也

上柱國鄧恢墓誌銘

咸亨二年 今在屯留縣西二十里鄧村

屯留縣志乾隆四年鄧村土地廟後因築塲得此墓石始知鄧村之所由名也

謹案文稱鄧君字文廓南陽人因官徙駕遂宅屯留

林山後魏神瑞元年建舊名慈林唐咸甯四年鄭惠王元懿爲潞州刺史建石塔藏舍利二十一粒下有藏經千卷釋洪撰碑咸甯乃咸亨之誤然碑稱往任潞州日於此山爲先聖造塔任潞州在貞觀十年爲先聖宮是爲高祖亦在是時則非咸亨四年矣碑云藏經三千卷亦非千卷碑稱智乘寺志無其名凡此皆可補正史地志之闕誤也碑書十三子作拾叁二十一粒作叁漆粒卽三七字餘數目不別用他字鄭惠王爲帝冑似可不必稱里貫而文云隴西狄道與蘭陵代國兩公同意當時習爲成例而不覺其非潛研堂曾斥之然猶未見此碑也

臨汾縣令于府君德政碑

咸亨四年二月 謝祐撰柳洋正書舊在臨汾縣見志略

智乘院碑

咸亨五年 鄭王文學阮立德撰李承福書舊在長子縣
法興寺

鄉正馬惲墓誌

上元三年十一月 今在太谷縣東二十里陽邑村

謹案誌文見縣志其銘已佚蓋石有缺損也文略云
君諱惲字海通扶風人也帝顓頊之苗胄楚靈王之
允緒祖逞齊任代州戶曹父暉隨任遼州博士君前
任鄉正春秋七十有七上元二年八月二十九日終
於私第上元三年十一月八日葬君於陽邑故城東
南一百五十步云云餘皆僞語案謂馬氏出自楚靈
王未詳所本隋開皇中用蘇威議五百家置鄉正一

人百家爲里置里長一人龍門令皇甫忠碑陰有鄉
老鄉長里正諸名蓋鄉正又稱鄉老同於漢之三老
金石錄有漢中平二年都鄉正街彈碑此馬君墓誌
亦題鄉正皆僅見也

南溪縣令孟貞墓誌

上元三年十一月 今在太谷縣陽邑村

謹案此誌與馬惲墓誌同時文大半相襲云君諱貞
字君漢河內人也帝顓頊之苗胄周文王之允緒則
是祖魯孟孫氏而謂顓頊之胄殊不可解下云望重
河內因官晉部先祖晉朝太尉魏室司空敷奏王言
宣揚帝命六語除河內因官諸字外全同彼誌馬誌云徵
望扶風官流晉部 祖法濟任邢州司戶父孫隨任朔州錄事

下云乃祖乃父冠冕相承爲質爲文俱參職位四語

詞意亦略同彼誌

馬誌云乃祖乃父簪纓門傳紹武嗣文鹽梅助化

君前任

戎州南溪令其下有云誰謂忠誠克著構疾相侵藥

餌不瘳沈痼遂固則彼此悉同一字不易矣初唐誌

銘率用駢儷一種通調輾轉沿襲而未有若此其甚

者且又生同地葬同時而千載後俱流散於世豈不

奇哉

誌云春秋七十有九以上元三年文末云左臨十一月二十日葬陽邑村東二里

像水右望紂祠像水卽象谷水也耐祠在鳳凰山側

耐泉上作紂誤又云前觀鼎嶽後眺尹岡今無其名

不知所指矣

上柱國任恭墓碑

上元三年十一月

舊在汾陽縣南十里文侯村

金石文字記任君名恭官至金紫光祿大夫上柱國臨濟縣開國男貞觀十七年二月卒夫人郭氏其文有日未挂東都之冠先覆北墉之首案論語伯牛有疾注禮病者居北牖下仁山金氏云牖字誤當作墉蓋室中北墉而南墉墉墉也

謹案柱國子名愛別葬城北三十里誌石於道光中爲谿水沖出誌云父恭驃騎大將軍臨濟縣開國男與碑題銜互異彼爲武散官此爲文散官皆加階也詳見下卷

梵境寺舍利銘

儀鳳三年 戴安業撰行書今在潞安府官莊寺

潞安府志梵境寺在城東北隋時建唐儀鳳三年賜潞

上正興元年十一月
三
州刺史賀拔正舍利四十九粒正與長史崔承休司馬
戴安業藏寺內舊塔下爲舍利銘刻石寺塔久廢萬歷
間居民取土得舍利並石刻潘定王瑄堯爲建塔於昭
覺寺東狀元朱之蕃記

長治縣志按潘王建塔時並碑銘瘞其下厥後寺圯塔
址夷爲田同治中爲耕者所啓石甃深固衆莫測聞於
郡守守命掩覆光緒己卯纂修邑志志局諸人始發其
甃得古刻四其二爲僧畫像無題識一隋碑一卽此碑
也舍利青白二色微瑩類瑪瑙大若豆瓣碎或如米粒
以琉璃小瓶儲之外韜銅盒二裝七寶質以香屑藏石
函內函絕大中別嵌一石刻濟藩記略云王獲舍利於
梵境廢寺有隋唐石刻隋僅存空器唐所藏者四十九

粒爲建銅塔於此并瘞其原石云云文不工亦不著撰
書人府志謂朱之蕃記或別有據也乃以舍利並石刻
置城東官莊寺唐碑行書有褚歐法隋碑乃楷隸時雜
篆隸郡中古刻無先於此二石矣

處士杜美墓誌銘

儀鳳四年 正書今在屯留縣

謹案墓石不知何時出土文見縣志處士遠祖岐魏
任上黨郡守屯留縣開國侯子孫因而宅此而標題
則書故處士京兆杜府君從其朔也唐宰相世系表
杜氏有襄陽洹水濮陽三望皆出自京兆而無上黨
其曾祖龍齊忠武將軍祖國隋江都縣令父暉唐儀
同三司皆不可考處士無所表見故文但述其先世

有云暉皇朝授儀同三司昭義烈也其時詔曰門下
杜暉等並保固城邑捍禦兇徒功效克隆宜從褒擢
咸依前授云云以處士年七十二卒於龍朔年計之
其父立功當在唐初或卽武德中突厥入寇事也墓
在余吾城西北六里故文云東瞻故邑西瞰三嵎三
嵎卽三嵎也

夏縣令元司哲清德碑

調露二年 隸書舊在夏縣

集古錄目元司哲清德碑八分書不著書撰人名氏思哲
字知人河南洛陽人以絳州夏縣令卒於官縣人右監門
校尉陰神義等爲此碑頌德

公士驍騎尉崔通墓誌銘

永清元年 正書今在屯留縣

屯留續志邑東北二十里崔蒙村同治年間村人掘土得石

謹案崔君字處微文敘其家世無顯者惟云懷橘之年早抱雄略屬以雲亭扈蹕社首告成授君驍騎尉云云蓋高宗乾封元年東幸泰山封禪禮成以扈衛之士得援恩例進秩者也標目書故公士驍騎尉崔君之銘文又注并序二字殊贅其妻申屠氏卒年三十六文猶云儀貞月亮色豔桃春當時習氣若此今人則褻甚矣

驍騎校尉李君墓誌

舊在稷山縣

稷山縣志唐驍騎尉李君墓在縣北厲壇西明萬曆三十
十八年邑人取土得石誌

謹案李君不詳其名及卒葬年月或石有闕泐故縣
志從略也新唐書百官志左右驍衛校尉各五人武
后光宅元年改驍衛曰武威此李君官驍騎校尉或
在高宗世歟姑與前志類次之

聞喜令蘇君德政碑

止書碑額大唐絳州聞喜縣令蘇君之碑亦正書今在聞
喜縣東鎮

謹案此碑自來無著錄者光緒癸酉河間戈青侯履
徵始訪得之文一千六百餘言剝落不及百字不知
何時重立爲劣工截其下體爲枘遂每行失去五字

不能讀矣青侯云蘇君名昱字奉景威之孫儼之子
官終濟州刺史在宰相世系表中尙爲大許公尊行
也碑文駢麗字迹絕工甚似王知敬其書者名克忠
而姓適值泐處並撰人名氏皆不可識矣案碑載蘇
君由明經上第官右衛倉曹參軍改授沛王府騎曹
參軍遭父憂去職服闋復爲沛府倉曹參軍職滿遷
聞喜縣令三載將代老幼追攀縣錄事宋德本等爲
樹碑銘其厯官之年文均不詳攷沛王卽章懷太子
賢也新唐書高宗本紀永徽六年封潞王龍朔元年
徙王沛咸亨三年徙爲雍王計王沛凡十二年蘇君
再爲府屬始遷縣令則官聞喜當在總章咸亨間碑
蓋咸亨年所立也文雖儼語不能詳其政實然在當

時固卓然一循吏矣

尉遲敬善墓誌

今在太原縣

太原縣志尉遲敬善墓在晉王嶺南鄆國公從弟也明嘉靖初墓發誌石存縣庫

武連令王姓墓誌銘

舊在壺關縣

壺關續志唐王府君墓舊在西柏林村今亡案府君名姓儀鳳二年官武連令石於明時出土舊志節略其文爲立傳據姓授官在上元儀鳳時年八十有二卒於私第葬西柏林村儀鳳距中宗嗣位僅六年似其卒當在武后時而文中無新製字無從取決

朝散大夫苗裕墓誌銘

嗣聖元年 正書今在屯留縣

謹案誌云君諱裕字君綽潁川長社人十一代祖漢景二年封潞縣侯食邑屯留子孫因家焉曾祖貴魏封安樂郡開國公祖王齊諫議大夫序家世不及其父所云十一代祖不書名據漢書功臣表孝景侯者十八人無封潞者所云潞縣侯食邑屯留不知何本也裕以隋開皇二年州貢進士射策甲科授游騎尉入唐官上黨郡主簿授朝散大夫年八十有六卒葬屯留故邑城北一里石不知何時出土屯留故城在今縣東南十里水經注所云故留吁國也

介休令張君情德碑

永昌元年九月 李願撰李敬八分書舊在介休縣

謹案碑見金石錄石不知亡於何時據唐書宰相世系表張文瓘清河東武城人相高宗第四子沖字孝源介休令當卽其人永昌武后臨朝之六年所改元也

箕州刺史成公碑

周天授二年 楊炯撰正書無姓名見金石錄舊在遼州翼城令張懷器去思碑

周天授二年 盧照鄰撰舊在縣城

志略懷器字志成貝州武城人嗣聖元年爲翼令天授二年進階去官邑人刻石頌之文見縣志

清化寺碑

周天授二年 牛元敬撰並行書舊在長子縣羊頭山
樂律全書羊頭山新記山之東有梵刹曰清化寺建自後
魏孝文太和之歲初名定國寺北齊改名宏福隋末寺廢
唐武則天天授二年重建改今額有碑乃唐鄉貢明經牛
元敬撰並書字道勁可觀頗類聖教序其而○等文非篆
非隸蓋武氏所製字也碑陰識云所有當寺方圓八里東
至秦關古道云云凡七十五字

游擊將軍何斌碑

周如意元年 今在介休縣侯堡村

處士常舉墓誌銘

周萬歲通天元年 行書今在屯留縣

屯留續志墓在城西十里魏村同治間土人築地得此

石處士以年躋九十三得授德州縣令不久卽卒葬屯留驛北一里然則今魏村在唐時曾置驛矣文中數目一三九十等字作壹叁玖拾授作秊月作㊦則武后所製字武后所製凡十二字以山水土爲地千千万爲年永主久王爲證長正王爲聖一忠爲臣一生爲人大吉爲君其天日月星間仿古篆天作而日作㊦月作㊦亦作四星作○又正作𠂔授作𠂔又作𠂔初作𠂔姬素墓誌銘

周聖歷二年 行書今在屯留縣

屯留續志石於道光間姬村出土書頗不工內奮西門之風彩奮誤作舊志輕軒冕性重林泉林下多一也字其日月聖授諸字皆用新製

太原王武士發墓碑

周長安元年 舊在文水縣

太平寰宇記并州文水縣太原王墓在縣西北十五里卽唐則天父武士驤也雙闕與碑石存

金石錄右周武士驤碑武后時追尊士驤爲無上孝明皇帝命李嶠爲碑文相王旦書石焉戎幕間談載李德裕言某爲太原從事見公牘中有文水縣牒稱武士驤墓碑元和年忽失龜頭所在碑上有武字凡十一處皆鐫去之碑高大非人力所及未幾武元衡遇害今此碑武字最多皆刻畫完好無訛闕者以此知小說所載事多荒誕不可信類如此

志略武后時以文水爲鄉里改縣爲武興尊父士驤爲周高祖母楊氏爲孝明皇后楊別葬咸陽名順陵此則其前母相里氏也以與兄子惟良等有夙憾卒未加封碑不知

亡於何時其地名攀龍臺李嶠有謝撰攀龍臺碑蒙賜物

表案新唐書武后以文水墓爲章德陵天授元年又號爲吳陵

上騎都尉相里瑞碑

今在汾陽縣北二十里小相村

金石文字記此碑漫滅特甚其可識者曰上騎都尉相里府君之碑曰相里瑞字鳳威曰夫人任氏而中有而塋字知其爲武后時立也

玉京宮天尊碑

長安二年 李泰撰撰口度書舊在絳州見碑目

武安君李牧廟碑

長安四年 李泰撰撰韋希弼書舊在絳州見碑目

稷山梁慎孝義碑

長安三年正月 李泰授撰八分書舊在稷山縣西王村
志略碑見金石錄按縣志梁慎字寶根天性至孝授曲周
主簿親歿結廬墓側有白鳩醴泉之瑞刺史孟說奏聞勅
旌其門

大雲寺碑

舊在絳州見金石略

志略煒按此碑金石略不著年月亦不著書撰人姓氏據
金石錄有大雲禪院碑云武后時有僧上大雲經陳述符
命遂令天下立大雲寺至開元二十六年詔改爲開元寺
然則此碑必則天時所立耳大雲經今不傳旣云陳述符
命令天下立寺則武后專制天下誅戮唐宗實有以啟之
謂此經爲妖書可也又按歐陽棐集古錄目有周大雲寺

碑太子中書舍人賈膺福撰八分書以大足元年五月立
未識卽此碑否案大足元年碑在河內縣又檢絳州志無
大雲寺名蓋寺名久改爲開元或廢或徙
碑至前明已亡作志
時無能考其舊蹟矣

通元觀碑

狄仁傑撰碑殘缺不可辨舊在榆社縣南三十里見舊通
志

處士霍良墓誌銘

景龍元年 舊在壺關縣

壺關縣志霍處士墓在城南七十里名良河東霍邑人
子孫於此聚族故名霍村

駙尉申屠行墓誌銘

景龍三年 正書今在潞城縣

謹案縣志墓石於道光中出土文駢叢略云君諱行
字子表金城人也因官宅此後遂家焉曾祖和鴈門
郡太守祖儒朝散大夫別敕授本州刺史父綽亦朝
散大夫君器韞冲和有志圖南敕授騎尉非其望也
春秋七十有二遘疾卒於私第夫人崔氏大夫豹之
猶子也以景龍三年十二月朔二日甲申合葬於潞
城縣西十五里平原云云自祖以上不詳何代行父
子但著勳階亦不詳何官也

白鶴觀碑

有陰

正書額隸書無年月及撰書人碑陰亦正書有天寶三載
字今在長子縣

長子縣志唐初書法多遵鍾太傅而永興虞世南爲最

邑城之西北田間樹唐白鶴觀碑碑陰有五言詩四十
四韻詩前有序字述可見者十二三後云改載歲春閏
月曉霽時清明節功既就事亦列卽天寶三載仲春閏
月前旬餘六日也玩其文意乃贊撰書碑陽者其筆致
頗類顏魯公碑陽則楷法運隸酷似虞永興而不列書
撰姓名乃唐武氏垂拱二年縣令高同爲高宗薦福而
立繼則縣宰鄭燧成於中宗復辟中宗神龍以後之碑
也考碑中應天皇帝乃中宗復辟神龍元年羣臣所上
尊號垂拱二年實中宗在房州之嗣聖三年其時前距
世南卒之貞觀十二年五月計年已四十有八後至天
寶三載計年又五十有九統計則百有七年矣而邑志
云天寶三載虞世南書抑何誤也邑志重纂於前明萬

歷間至今幾二百年矣當時碑版字畫雖已不了了未必如此其甚乃棄而弗考據耳食而書焉疎矣予於是碑摩挲靜觀幾一月而意句始得因錄其文以質好學深思之士其中有絕無字形可見則逆文意而以已意補之雖補亦旁注闕疑也然其爲文也鴻博淹雅其爲字也翩矯澹穆父老相傳當日有隱君子者能爲永興書爲有力者所矜雖書之亦如宋之安民不願刻名於黨人碑末亦事之未可知也嗚呼山林之士有文字可以上埒古人因姓名弗彰湮沒而不傳於後世者獨撰書此碑者歟哉乾隆甲辰十二月三日秬山馮士翹跋

謹案白鶴觀久圯碑穹然峙舊址中石並額高八尺許寬約四尺文三十八行行七十字作碁局文額題

大唐潞州長子縣白鴿觀之碑文前無標目後無年月及撰書姓名下截字多剝泐上半則完好僅闕數字耳縣人馮文翹竭彌月之力就碑摩挲盡釋其文始可屬讀據文有云垂拱二年長子縣宰高同營創基宇造立尊容建此豐碑旌以功德屬高公坐事去官愿載推遷不遑修復伏維應天皇帝陛下睿圖鼎盛寶命維新重光上下提福神靈又云行長子縣令鄭燧丞白諒主簿辛齊物尉王晟張瑜等咸能蹈因緣之間奧竭精衛之精誠觀主谷太希道士關興圖等願循諸已禁日姓以承恩伏想帝鄉輜天崩而倍恰乃與邑宰鄭公等造斯妙像同立勝緣上奉聖因側申追福云云則碑琢於垂拱年至中宗復辟後始

鐫文迫樹盡無疑也其書方整險勁時雜隸意與永興書宗山陰爲南派者全別而歷來皆以爲似永興又直目爲虞書可怪也碑陰未見搨本據馮跋則別一人書前序已泐詩見縣志玩其語乃贈王屋山人者起句云嘗聞王屋山積思長安道及爾因歸妹便得窮探討中有云先生屢徵辟出谷清輝結思鴻寶旣殊玉花琴自寶身雖侍蒼闕心每搖蓬島又云沖詔暫辭闕傾朝贈文藻如非道可尊安得升元造考司馬承禎睿宗時嘗召至闕賜寶琴霞紋帙放還開元中再被召元宗詔於王屋山置壇室以居詩似卽贈承禎者其爲誰作並刻此碑之陰則不可攷或天寶初重修斯觀承禎曾遊此或道士中有承禎之徒

實主其事故並刊舊什以爲榮歟據碑文列黃冠姓名凡十九人云或筮仕周行或棲閑鄭圃知其中故有棄官學道者而碑陰云改載孟春功旣就事亦列別記營建事與前文不相蒙也

右臺侍御史宋務光墓碑

今在永甯州南五十里碑文剝落見州志

右唐碑碣起武德至景龍

山西通志卷九十一